

V E N D I M
Nr. 615, datë 2.11.2001

PËR DISA SHTESA DHE NDRYSHIME NË VENDIMIN NR.288, DATË 18.6.1999 TË KËSHILLIT TË MINISTRAVE "PËR MIRATIMIN E DOKUMENTIT TË POLITIKËS SË ZHVILLIMIT TË TELEKOMUNIKACIONEVE NË REPUBLIKËN E SHQIPËRISË", NDRYSHUAR ME VENDIMIN NR.311, DATË 5.7.1999 TË KËSHILLIT TË MINISTRAVE

Në mbështetje të nenit 100 të Kushtetutës dhe të nenit 4 të ligjit nr.8618, datë 14.6.2000 "Për telekomunikacionet në Republikën e Shqipërisë", me propozimin e Ministrit të Ekonomisë Publike dhe Privatizimit, Këshilli i Ministrave

V E N D O S I:

1. Miratimin e disa shtesave dhe ndryshimeve, që i bashkëlidhen këtij vendimi, të dokumentit të politikës së zhvillimit të telekomunikacioneve në Republikën e Shqipërisë, miratuar me vendimin nr.288, datë 18.6.1999 të Këshillit të Ministrave.

2. Vendimi nr.311, datë 5.7.1999 i Këshillit të Ministrave shfuqizohet.

3. Ngarkohen Ministria e Ekonomisë Publike dhe Privatizimit dhe Enti Rregullator i Telekomunikacioneve për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta

Shtesat dhe ndryshimet e dokumentit "politika e zhvillimit të telekomunikacioneve në republikën e Shqipërisë"

1. Pika 2 "Objektivat afatmesme", tek objektivi "të stimulohet ofrimi i shërbimeve të reja" të shtohet paragrafi me këtë përmbajtje:

"Infrastruktura globale e informacionit, e bazuar në teknologjitë e reja të telekomunikacioneve dhe kompjuterave, krijon kushtet për sigurimin e një shkalle të madhe të shërbimeve të reja.

Me qëllim realizimin e një roli kyç të sektorit të telekomunikacioneve dhe infrastrukturës së shërbimeve të tyre për zhvillimin e shoqërisë së informacionit qeveria do të mbështesë hartimin në të ardhmen të politikave dhe, mbi bazën e tyre, të akteve, ligjore dhe nënligjore, që do të shërbejnë për garantimin e zhvillimit të shoqërisë së informacionit në Shqipëri."

2. Paragrafi i dytë i pikës 4 "Privatizimi" të ndryshohet si më poshtë vijon:

"Qeveria ka vendosur të kërkojë një partner strategjik për Albtelecom, sh.a.-në nëpërmjet një tenderi ndërkombëtar, shpallja e të cilit është planifikuar të bëhet brenda vitit 2001. Qeveria nuk synon të mbajë kontrollin e shoqërisë."

3. Pas pikës 4 "Privatizimi" të shtohen paragrafet me këtë përmbajtje:

"Gjithashtu, qeveria do të nxjerrë aktet e nevojshme që, në çastin e privatizimit të Albtelecom sh.a.-së, blerësit e paketës së aksioneve të Albtelecom sh.a.-së t'i jepet një licencë për ofrimin e shërbimit celular. Lincenca do t'i jepet një shoqërie të re të zotëruar nga blerësit dhe shërbimi do të lejohet të ofrohet vetëm pas datës 31 dhjetor 2002.

Për këtë qëllim, në dokumentet e tenderit të hapur ndërkombëtar për privatizimin e Albtelecom sh.a.-së, bashkë me shitjen e paketës së aksioneve të shoqërisë, do të përfshihet edhe dhënia e licencës për ofrimin e shërbimit të GSM-së.

Për të siguruar konkurrencën e ndershme në tregun e telekomunikacioneve, me privatizimin e Albtelecom sh.a.-së, duhet të sigurohet operimi i tre operatorëve GSM, në kushte të barabarta marrëveshjeje në raport me Albtelecom sh.a.-në".

4. Pas paragrafit të dytë të pikës 8 "Zonat rurale" të shtohet paragrafi me këtë përmbajtje:

"Albtelecom-it do t'i kërkohej që, në fund të vitit 2004, 5 për qind e përdoruesve të shërbimeve të tij, të palëvizshëm, të jenë banorë të zonave rurale, të shpërndarë proporcionalisht në të

gjithë territorin e vendit. Për këtë qëllim, si dhe për të mbështetur operatorët ruralë, në përfundim të vitit 2004 Albtelecom sh.a.-ja duhet të sigurojë akses në rrjetin e vet nëpërmjet lidhjeve me kapacitet jo më të vogël se 2 Mbit/s (30 linja) në çdo qendër komune."

5. Paragrafi i tretë i pikës 8 "Politikat e licencimit për shërbime publike" të ndryshohet si më poshtë vijon:

"Procedurat e licencimit do të zbatohen në përputhje me dispozitat ligjore në fuqi. Qeveria do të përcaktojë numrin e licencave që do të jepen për shërbimet e klasifikuara në kategorinë e parë të tabelës së përmendur më sipër. Edhe me hapjen e plotë të tregut të telekomunikacioneve për konkurrencë, pas datës 31 dhjetor 2002, disa shërbime do të vazhdojnë të ekzistojnë në këtë kategori, ku numri i licencave është i kufizuar. Një klasifikim i tillë do të bëhet për ato shërbime që përdorin burime të kufizuara natyrore, siç janë frekuencat."

6. Paragrafët e dytë dhe të tretë të pikës 13 "Menaxhimi i frekuencave" të ndryshohen si më poshtë vijojnë:

"Dhënia e frekuencave nga ERT-ja ndaj përdoruesve civilë do të bëhet në përputhje me përcaktimet e Planit Kombëtar të Radiofrekuencave. Drejtoria e Përgjithshme e Postë-Telekomunikacioneve do të ndjekë zhvillimet botërore më të fundit për sa u përket radiokomunikacioneve dhe do të bëjë propozimet përkatëse për të reflektuar në këtë plan vendimet më të fundit të ITU-së, CEPT-së dhe direktivat e Bashkimit Europian.

Për të siguruar në të ardhmen një numër, mundësisht, sa më të madh operatorësh celularë, është i domosdoshëm përdorimi sa më i frytshëm i brezave të radiofrekuencave të caktuara për shërbimet publike celulare, të cilët janë një burim natyror i kufizuar. Për këtë qëllim, dhënia në të ardhmen nga ERT-ja e licencave për shërbimet celulare, si dhe e brezave përkatës të radiofrekuencave për sigurimin e këtyre shërbimeve do të bëhet me procedura tenderi apo ankandë. ERT-ja do të garantojë që operatorët celularë të operojnë në kushte të njëjta."

7. Paragrafi i dytë i pikës 11 "Rregullimi i tarifave" të ndryshohet si më poshtë vijon:

"Për Albtelecom sh.a.-në çmimi tavan do të zbatohet ndaj të gjithë elementëve të shërbimeve telefonike bazë. Për më tepër, do të ketë kontrolle specifike ndaj tarifave për pagesat mujore dhe bisedat lokale. Mekanizmi i saktë do të specifikohet në licencë. Ky mekanizëm çmimi tavan do t'i mundësojë Albtelecom-it të rregullojë çmimet e veta drejt kostos duke filluar nga viti 2001."